

Samþykkt um Heilbrigðiseftirlit Vesturlands

1. Markmið og hlutverk

1.1

Heilbrigðiseftirlit Vesturlands, skammstafað HEV, er byggt á samstarfi ellefu sveitarfélaga, Akraneskaupstaðar, Borgarbyggðar, Dalabyggðar, Eyja- og Miklaholtshrepps, Kjósarhrepps, Grundarfjarðarbæjar, Helgafellssveitar, Hvalfjarðarsveitar, Skorradalshrepps, Snæfellsbæjar og Stykkishólms. Um fyrirkomulag stjórnar, starfmanna, starfssvæðis og framkvæmd fer skv. lögum nr. 7/1998 um hollustuhætti og mengunarvarnir. Heimili HEV og varnarþing er að Innri mel 3, 301 Akranesi.

1.2

Heilbrigðisnefnd Vesturlands sem fer með yfirstjórn HEV, ber að sjá um að framfylgt sé ákvæðum laga þessara og reglugerða settra samkvæmt þeim, samþykktum sveitarfélaga og ákvæðum í sérstökum lögum eða reglum sem nefndinni er eða kann að vera falið að annast framkvæmd á. Nefndin skal vinna að bættu heilbrigðiseftirliti á svæði sínu, annast fræðslu fyrir almenning og efla samvinnu við önnur yfirvöld og aðila sem vinna að þessum málum.

2. Aðalfundur og skipan heilbrigðisnefndar

2.1

Aðalfundur Heilbrigðiseftirlits Vesturlands skal haldinn árlega. Á dagskrá aðalfundar skal taka fyrir ársskýrslu heilbrigðisnefndar, ársreikninga og önnur mál.

Heilbrigðisnefnd skal kosinn eftir hverjar sveitarstjórnarkosningar á aðalfundi Heilbrigðiseftirlits Vesturlands. Um hæfi stjórnarmanna fer skv. ákvæðum sveitarstjórnarlaga. Það ár skal aðalfundur haldinn fyrir lok júlímánaðar enda hafi umboð frá fráfarandi heilbrigðisnefnd verið framlengt sem því nemur eins og heimild er til í 40. gr. sveitarstjórnarlaga nr. 45/1998. Á aðalfundi hefur hvert sveitarfélag atkvæðisrétt í samræmi við íbúafjölda í sveitarfélaginu eins og hann var 1. desember næstliðins árs.

2.2

Kosnir skulu fimm aðalmenn og jafn margir varamenn. Samtök atvinnurekenda á svæðinu eiga rétt á að tilnefna í nefndina einn fulltrúa. Einnig eiga náttúruverndarnefndir sveitarfélaganna rétt á að tilnefna einn fulltrúa í nefndina með málfrelsi og tillögurétt og er hann tilnefndur af stjórn Samtaka sveitarfélaga á Vesturlandi. Að öðru leiti fer um rétt til setu á heilbrigðisnefndarfundum skv. lögum nr. 7/1998 um hollustuhætti og mengunarvarnir.

3. Fundir heilbrigðisnefndar

3.1

Heilbrigðisnefndarfundi skal halda eftir þörfum en eigi sjaldnar en sex sinnum á ári og er nefndarfundur ályktunarhæfur sé meiri hluti nefndarinnar mættur. Fundir eru boðaðir ef þörf krefur að mati heilbrigðisnefndar eða ef eitt aðildarsveitarfélaga krefst þess skriflega.

3.2

Framkvæmdastjóri í samráði við formann heilbrigðisnefndar útbýr dagskrá heilbrigðisnefndarfunda með málum sem liggja fyrir nefndinni til afgreiðslu, og kynningar ásamt því sem útgefin starfsleyfi og umsagnir sbr. 5. kafla eru lagðar fram. Fundargögn eru vistuð jafnóðum á miðlægu svæði sem er aðgengileg heilbrigðisnefnd.

3.3

Fundargerðir og fundarsamþykktir heilbrigðisnefndarfunda skal færa í sérstaka fundargerðarbók. Ef fundargerð er skrifuð í tölvu skulu allir fundarmenn kvitta undir fundargerðina og auk þess skulu þeir setja upphafsstafi sína á hverja blaðsíðu. Fundargerð skal lesin upp í fundarlok og borin undir atkvæði ef þess er kostur en heimilt er að fela fundarstjóra og fundarritara að ganga frá fundargerðinni. Ef haldinn er rafrænn fundur getur undirskrift farið fram rafrænt eða að fundarmenn skrifa undir við fyrsta hentugleika. Að fundi loknum er fundargerð ásamt fundargögnum send til aðildarsveitarfélaga til upplýsinga.

4. Um stjórn og starfslið

4.1

Heilbrigðisnefnd Vesturlands er málsvari HEV og framfylgir samþykktum nefndarfunda. Heilbrigðisnefndin vinnur að stefnumarkandi málum og gerir tillögur um ný mál. Heilbrigðisnefnd gerir fjárhagsáætlun og leggur fyrir sveitarstjórnir eigi síðar en 15. október ár hvert. Sveitarstjórn telst samþykkt fjárhagsáætlun hafi skrifleg athugasemd ekki borist HEV fyrir 1. desember. Fjárhagsáætlun telst samþykkt þegar sveitarfélög með meirihluta íbúa á Vesturlandi hafa samþykkt hana.

4.2

Heilbrigðisnefnd ber ábyrgð á að starfað sé í samræmi við samþykktu fjárhagsáætlun og skal senda sveitarstjórnnum endurskoðaðan og áritaðan ársreikning þegar hann liggur fyrir.

4.3

Heilbrigðisnefnd er heimilt að setja gjaldskrá í samræmi við 46. gr. laga nr. 7/1998 um hollustuhætti og mengunarvarnir og lætur birta hana í B deild Stjórnartíðinda. Framkvæmdastjóri heilbrigðiseftirlits sér um álagningu gjalda skv. gjaldskránni í umboði heilbrigðisnefndar.

4.4 Heimilt er heilbrigðisnefnd að semja um þjónustu Heilbrigðiseftirlit Vesturlands við sveitarfélög utan eftirlitssvæðisins, enda standi tekjur af þeirri þjónustu undir útgjöldum vegna hennar.

4.5

Heilbrigðisnefnd skal fyrir 1. ágúst ár hvert birta á vefsvæði sínu skýrslu um starfsemi sína, þar sem fram komi yfirlit um helstu verkefni og áherslur undangengins árs, ásamt ársreikningi.

4.6

Heilbrigðisnefnd ræður framkvæmdastjóra, markar starfssvið hans og launakjör og gerir við hann skriflegan ráðningarsamning. Framkvæmdastjóri ræður aðra starfsmenn. Heimild nefndarinnar þarf að liggja fyrir, ef um fjölgun stöðugilda er að ræða. Um starfskjör starfsmanna HEV fer samkvæmt ákvæðum kjarasamninga og ráðningarsamnings.

4.7

Framkvæmdastjóri veitir Heilbrigðiseftirliti Vesturlands forstöðu og annast framkvæmd málefna eftir því sem heilbrigðisnefnd ákveður. Hann hefur í hendi starfsmannastjórn og sér um að rekstur sé innan fjárheimilda. Framkvæmdastjóri á sæti á heilbrigðisnefndarfundum.

4.8

Framkvæmdastjóri skal að jafnaði boða heilbrigðisnefndarfundum í samráði við formann nefndarinnar. Telji formaður stjórnar að óeðlilegur dráttur sé á fundarboðun, getur hann hlutast til um fundarboðunina. Framkvæmdastjóra er skylt að leggja fyrir heilbrigðisnefnd allar stefnumarkandi ákvarðanir.

5. Embættisafgreiðslur Heilbrigðiseftirlits Vesturlands

5.1

Framkvæmdastjóra Heilbrigðiseftirlits Vesturlands er heimilt að gefa út eftirfarandi starfsleyfi samkvæmt heimild í 10. gr. laga nr. 58/2019 um breytingu á lögum um hollustuhætti og mengunarvarnir, lögum um meðhöndlun úrgangs og lögum um meðferð elds og varnir gegn gróðureldum (stjórnvaldssektir o.fl.) sbr. 48. gr. laga nr. 7/1998 um hollustuhætti og mengunarvarnir.

- a. Framkvæmdastjóra er heimilt að gefa út starfsleyfi fyrir atvinnurekstur sem talinn er upp í X viðauka reglugerðar nr. 550/2018 um losun frá atvinnurekstri og mengunarvarnareftirlit m.s.br., sbr. lög um hollustuhætti og mengunarvarnir nr. 7/1998 m.s.br.
- b. Framkvæmdastjóra er heimilt að gefa út starfsleyfi til stofnana og fyrirtækja í samræmi við 6. gr. laga um hollustuhætti og mengunarvarnir nr. 7/1998 m.s.br. Þegar efnislegar athugasemdir berast við drög að starfsleyfi í útgáfuférlinu skv. a og b lið skal heilbrigðisnefnd upplýst um málið og það tekið fyrir á næsta fundi heilbrigðisnefndar.
- c. Framkvæmdastjóra er heimilt að gefa út starfsleyfi fyrir hönd nefndarinnar í samræmi við ákvæði reglugerðar nr. 103/2010 um gildistöku reglugerðar Evrópuþingsins og -ráðsins (EB) nr. 852/2004 um hollustu er varða matvæli

m.s.br. og ganga að fullu frá þeim milli funda ef skilyrðum fyrir starfsleyfi er að fullu mætt.

- d. Framkvæmdastjóra er heimilt að gefa út tóbakssöluleyfi fyrir hönd nefndarinnar skv. lögum nr. 6/2002 um tóbaksvarnir og ganga frá þeim milli funda ef skilyrðum fyrir sölu tóbaks er að fullu mætt.

5.2

Starfsmenn heilbrigðiseftirlits sjá um að gefa umsagnir um rekstrarleyfi fyrir veitinga- og gististaði skv. 10. gr. laga um veitingastaði, gististaði og skemmtanahald nr. 85/2007 m.s.br. í umboði heilbrigðisnefndar samkvæmt heimild í 48. gr. laga nr. 7/1998 um hollustuhætti og mengunarvarnir.

5.3

Starfsmönnum heilbrigðiseftirlits er falið að svara erindum og bréfum f.h. nefndarinnar. Jafnframt að vinna umsagnir um teikningar og skipulagstillögur frá sveitarstjórnnum sem og samþykktir sveitarfélaga skv. lögum um hollustuhætti og mengunarvarnir nr. 7/1998 m.s.br.

5.4

Framkvæmdastjóri getur ávallt vísað málum skv. 5.1 – 5.3 til afgreiðslu heilbrigðisnefndar. Ef ætla má að aðili máls muni ekki sæta niðurstöðu starfsmanna heilbrigðiseftirlits skal hann vísa málinu til afgreiðslu heilbrigðisnefndar. Um mál sem orka tvímælis, t.d. umsóknir um starfsleyfi þar sem skilyrðum er ekki að fullu mætt, en mál þola ekki bið, er framkvæmdastjóra falið að afgreiða mál að höfðu samráði við formann heilbrigðisnefndar, svo framarlega sem þessir aðilar eru sammála um afgreiðsluna. Jafnframt er heimilt að leita samþykkis heilbrigðisnefndar með tölvupósti í einstaka málum ef tilefni er til en að öðrum kosti skal kalla saman heilbrigðisnefndarfund.

5.5

Framangreindar afgreiðslur starfsmanna skulu lagðar fram til kynningar á næsta reglulega fundi heilbrigðisnefndar.

6. Um úrsögn og slit

Komi til þess að vegna breyttra forsendna/laga að samþykkt þessari verði sagt upp skal slíkt gert með 6. mánaða fyrirvara og tekur uppsögnin gildi frá næstu áramótum þar á eftir. Um úrsögn fer að öðru leiti skv. ákvæðum sveitarstjórnarlaga.

7. Um breytingar á samþykktum og gildistökuákvæði

7.1

Samþykkt þessa skal taka til endurskoðunar á aðalfundi ef sveitarfélög með meirihluta íbúa á Vesturlandi óska þess. Sveitarfélög með ⅔hluta íbúa svæðisins þurfa að samþykkja breytingar til að þær öðlist gildi. Tillögur til breytinga á samþykktum skulu sendar fulltrúum minnst tveimur vikum fyrir fund.

7.2

Samþykkt þessi öðlast gildi um leið og reglugerð tekur gildi um að Kjósarhreppur færir undir starfssvæði Heilbrigðiseftirlit Vesturlands. Samþykktin skal auglýst í B. deild Stjórnartíðinda.

Á aðalfundi heilbrigðisnefndar Vesturlands þann 24. mars 2021 var ákveðið að vísa samþykktinni til afgreiðslu á eigendafundi í maí.

f.h. Heilbrigðisnefndar Vesturlands

Þorsteinn Narfason, framkvæmdastjóri.